

AVANT-PROPOS.

*& modernes. L'autre piece que nous auons iugée necessaire pour le compli-
ment de cét ouurage est un discours de l'origine des Ordres de Religión insti-
tuez dans le pays de la Chrestienté: lequel ne pouuant pas commodément estre
inseré en tous les lieux où nous auons discoursu de la Religion des Roiaumes,
nous l'auons mis separémēt & en la fin de ce Liure. La lecture de ce petit dis-
cours est, ie ne diray pas seulement delectable & curieuse, mais utile, voire ne-
cessaire à ceux qui ne se trouuans propres aux affaires du monde veulent em-
brasser la vie contemplative & quittant le temporel, s'adonner au spirituel.
Vous y trouuerez aussi un autre discours des origines des Cheualiers & Or-
dres Militaires de la Chrestienté: & comment, par qui, & en quel temps ils
ont esté instituez, & à quelles intentions, & sous quelles regles & discipli-
nes, blazons & deuises desdits Ordres.*

*Or tout tel qu'est cét ouurage ie vous l'offre fort volontiers & desire que
vous apportiez, autant d'affection à le voir que s'en ay en à le tracer, & que
prenant quelque goust à cette lecture, vous y receniez, autant de plaisir qu'il
m'a donné bien souuent de peine.*

*Voiez le donc, ie vous prie, non avec precipitation, mais avec du soin & de
la diligence, & si quelque chose vous y desagrée, ne blasmez pas tout un corps
pour une tare, ou pour un poireau. Passez toujours outre pour vous contenter
& recherchez les matieres qui vous peuuent satisfaire, & quoy que vous y
trouuiez, si vous ne me voulez espargner pour ma deffence, faites le du moins
à raison de mon dessein. Adieu,*

